

20 SEP 2002
BELANJAWAN-CUKAI JUALAN
PENILAIAN CUKAI JUALAN DISERAGAMKAN

KUALA LUMPUR, 20 Sept (Bernama) -- Kerajaan mencadangkan agar kaedah penilaian bagi barangan pembuatan tempatan diseragamkan dengan kaedah penilaian barangan import yang berdasarkan nilai transaksi, untuk mengurangkan beban cukai jualan barangan pembuatan tempatan serta meningkatkan daya saingnya.

Perdana Menteri Datuk Seri Dr Mahathir Mohamad yang mengemukakannya dalam Belanjawan 2003 berkata cadangan itu akan berkuatkuasa mulai 1 Jan 2003.

Pada masa ini, nilai barangan import bagi tujuan pengiraan cukai jualan adalah sama dengan nilai yang digunakan untuk mengenakan duti import.

Nilai barangan import ditentukan mengikut kaedah penilaian Pertubuhan Perdagangan Dunia (WTO) yang berdasarkan nilai transaksi dan ia (nilai transaksi) tidak boleh diubah kecuali mempunyai bukti.

Dr Mahathir yang juga Menteri Kewangan semasa membentang Belanjawan 2003 itu di Dewan Rakyat hari ini berkata bagi barangan pembuatan tempatan pula, penentuan nilai bagi maksud cukai jualan adalah berdasarkan penilaian konsep "notional" yang menggunakan harga pasaran terbuka di mana nilai barangan boleh dinaikkan dalam keadaan-keadaan tertentu.

Tanggungjawab membuktikan harga pasaran terbuka terletak di pihak pengilang.

Kaedah penilaian yang berbeza ini boleh menjadikan barangan pembuatan tempatan dikenakan cukai jualan yang lebih tinggi, kata beliau. -- BERNAMA
NN NHD